

ANIMATI

ANIMATI



АЛАШТЫҢ САРҚЫТЫ ЕДІ – ӘШІРБЕГІМ

Серік ТҰРҒЫНБЕКҰЛЫ, ақын, Халықаралық «Алаш» әдеби сыйлығының лауреаты



(Қайтыс болған күні туған жыр)

Басқадан

Бұрын сезіп –

Ғасыр демін.

Ақтарып кеудесінен

Асыл кенін.

Сақталған

Сары алтындай

Сандығында –

Алаштың сарқыты еді –

Әшірбегім.

Қалайша тоқтап қалды бұл жүрегің,

Думанды тойда отырсаң –

Дүлдүл едің.

Сезетін татып қалсаң дәмін бірден,
Театр тарихының білгірі едің.

Сөздерің – айбалтадай,
Батыл айтып,
Көздерін талайлардың бақырайтып.
Шындықтың безбенінде тұрған сәтте,
Көрмеген ешқашанда беті қайтып.

Биікте желбіремей туым бүгін,
Жанымды қуырдақтай қуырды мұң.
Қазақтың театрының
Иығынан –
Сыпырылып,
Сусып түсті туырлығы.

Жасынан туа бітті –
Абыз едің,
Кешегі арыстардың нақ ізі едің.
Дендеген дерті болса театрдың,
Жаңғақтай қолыңа ұстап шағып едің.

Осылай ардақ тұтып,
Алаш атын,

Байқалып тұрушы еді –

Парасатың.

Мәселе әділдікке тірелгенде,

Өзіңмен адам жоқ-ты таласатын.

Ондайда түспеуші еді алдыға ешкім.

Басыннан алуан-алуан халді кештің.

Еліңнің ақиқатын айтар кезде,

Басында тұрушы едің – мәңгі көштің.

Тез танып,

Терең менен тайызыңды,

Қалдырдың заманыңа сай ізінді.

Мен кейде айта алмаған сөзім болса,

Сен айтып қандырушы ең айызымды.

Қашанда

Көкірегің – өлең-дастан.

Көрсетпей кемдігіңді кемел жастан.

Көз көрген замандастар қатарында

Шешенді көрген жоқпын сенен асқан.

Сынаттап –

Айдың жүзін,

Гүлдің атын

Кеудене қондырушы ең,

Күн қуатын.

Биіндей

Баяғының отырушы ең,

Бар дауды жалғыз сөзбен тындыратын.

Білмеймін қалай болдың басқаменен,

Көңілің маған деген аспан-әлем.

Бұлбұлдай көз алдымнан ұшып кетті,

Бір ауыз сөзім саған

«Әшке!» деген.

Өтсе де,

Бұл дүниеден неше дана,

Жай табар жүрек «жаным» десе ғана.

Ғайыптан қайда көшіп кете бардың,

Менімен сөйлесіп ең,

Кеше ғана.

Өмірдің өзінде еді еркін бағы,

Әкетіп бара жатқан дертің кәні...

«Ғаламат ақыны, – деп, – бұл қазақтың»,

Ғажайып сөз қалдырдың мен туралы.

Атақ жоқ,

Маған енді одан асқан,

Жолыма қанат бердің қадам басқан.

Әспеттеп сенің қайран ғұмырыңды,

Жазсам да артық емес,

Ода-дастан!